

平定縣志
紀略

927
S4431

THE
JOURNAL
OF
THE
ROYAL
ANTHROPOLOGICAL
INSTITUTE

1907
1908

平定猺匪紀略

趙子青者廣東連州過山猺向習巫師與趙金隴並不相識聞趙金隴謀反猺人踈附者多欲來會合幫助到湖南知趙金隴已殲斃遂捏稱師徒自名猺王希圖哄騙愚猺乘機擄脇偽封粵猺趙文興趙仔澄趙友漬即文貴為總兵於四月初六等日同趙文興糾約粵匪多人在連州黃茅冲江田堡等處搶刦五月初四等日率領众猺在沙平地方與粵兵打仗傷斃官兵三十餘名並外委一名聚賊三四百人竄入湖南藍山所管之界頭山爛泥坳及江華之濠江冲

沿途脇裹有二千餘人由大小林崗冲刳掠斫斷錦
田糧道

欽差尚書禧公將軍瑚公與制府盧公酌商恐猺匪
深入九冲煽惑良猺飛檄文武員弁前赴各冲要隘
妥為安撫防護並添派貴州松桃協游擊馬貴帶兵
四百名馳往策應又派桂陽州知州王元鳳候補知
縣蔣庸縣丞吳相洪陸續轉運糧餉軍火等物俾資
接濟余提督曾總兵於二十一日先後俱到錦田飭
令叅將興安泰帶領弁兵五百名自背江口至濠江堵
截我兵正在紮卡猺匪四五百人由濠江之半山樹

林中衝出直撲營卡興安泰喝令施放鎗砲立斃在
前賊匪數名內有手執紅旂賊目領众上前我兵急
催鎗砲趕至隔河轟擊斃賊二十餘名並將執紅旗
賊目擊斃賊匪退至半山屯紮二十二日余提督至
濠江口其處中隔一河地勢窄狹當即就岸立營賊
匪亦伐木築卡與我兵抵拒二十三日黎明副將張
必祿叅將王錫朋興安泰帶領得力備弁在前探剿
提督總兵督率大隊弁兵繼進賊匪順濠江冲山頂
且戰且行兩面皆窮谷深澗樹木叢雜官兵魚貫前
進跟追四十餘里至銀匠冲地方徭匪佔據三處山

頭戰手在前兩山婦女幼稚新脇猺人在後一山助
勢吹號催戰我兵先用砲擊皆被土梗間隔不能中
賊亡勢愈兇以鎗手長矛數百下壓張必祿王錫朋
率領備弁奮力上攻總兵督同興安泰等向賊佔右
山仰擊提督率黔楚大隊弁兵向賊佔左山抄殺鎗
砲並發立斃猺匪三四十名一時兩山賊匪拚命下
壓我兵鎗擊及刀矛刺殺復數十名該匪抵死抗拒
不退貴州兵丁羅亨祿帶旗登山連斃二賊提督總
兵乘勢督兵直前攻撲立時殺斃紅白旗手二名張
必祿指令兵丁擊殺身穿黃色馬褂賊目十數名王

錫朋親執長矛紫斃紅旗兇悍頭目一名並獲其旗
上寫有兩廣總督趙文興字後山之新協徭人並婦
女幼稚見我兵勢大一時奔退在前戰手不敢抵敵
均回頭逃竄我兵前追殺斃賊不計其數時已昏黑
不能窮追即就打仗處露宿共計二十二三兩日殺
斃徭匪割有耳級呈驗者三百二十餘名生擒男婦
二百餘名奪獲鎗矛无数陣亡兵丁四名帶傷弁兵
六十九員名二十四日提督復督兵追捕二十餘里
見有在楚被脇男婦俱在深林躲匿提督傳令本地
徭生徭總逐名喚出派員分交地方官認明安置妥

為撫恤尚有賊匪一二百人欲由葛籐冲竄回粵東
經防堵大橋都司色成額守備楊昌凱攔頭剿殺十
餘人擒獲男婦五十餘人其餘向麻岡冲一帶逃竄
提督派叅將王錫朋帶兵跟踪搜捕副將張必祿叅
將興安泰在銀匠冲一帶接應並飭九嶷山都司郭
宏昇等凡遇粵省路徑到處截拏提督駐紮濠江以
為聲援二十九日張必祿王錫朋在麻岡地方帶領
鎮筭兵丁將首逆趙子青及其妻併子趙狗兒女趙
三妹一同擒獲訊明後即將首犯凌遲處死其逃出
餘匪多已就獲惟賊目趙仔濠帶數十人逃竄已飭

各卡防堵將弁嚴密查拏奉

諭旨盧坤余步雲交部議叙王錫朋奮勇可嘉以副將即陞先換頂戴兵丁羅亨祿亦屬勇敢以把總拔補其在事出力人員及受傷陣亡弁兵分別獎勵賜恤

粵獠趙子青竄入楚境裹脇至二千餘人之多
往來游奕俱在深山密箐中提鎮等會同防捕
兜剿我兵乘勝之後勇氣百倍旬日間渠魁授
首邊境肅清時廣東排獠尚未歲事

諭旨切責粵省將校不若湖南督提鎮將剿盪迅捷

告戒策勵至再至三迨

欽差禧公瑚將軍甫至匝月率提鎮進剿如摧枯拉朽即奏膚功乃知

天威遠震非尋常思慮所及也

盤均華者湖南寧遠縣過山徭人嘉慶二十年移居江華縣上五堡二十三年復遷居廣西賀縣道光五年搬至蒼梧縣旱塘種山度日在湖南時曾與趙金隴相識後至賀縣與逆徭鄧進印馮文科趙有相趙春友交好十二年三月鄧進印等先後至盤均華家探望與均華盤生香等道及廣西徭山人多山少不

敷食用又值趙金隴在楚省造反各處守卡鄉勇恐
有奸匪勾連禁止猺人越境往來不能出山交易生
計更難盤均華起意糾約衆猺闖卡同遏湖南幫助
趙金隴希圖奪得民猺山寨分佔田地鄧進印等均
被蠱惑聽從分途邀協猺衆六月十_{十六}等日盤均華
前赴賀縣所屬之白竹磨刀古瓢各冲邀協土猺男
婦千餘人其時聽聞趙金隴已被官兵剿滅已到湖
南人少不濟復至趙金香趙元義等家飲酒集議西
省巡撫提督聞報飭令文武督兵剿辦賀縣防堵文
武先帶兵追捕維時官軍未集盤均華與趙金香等

聲言趙金隴衆夥已死田地多有空閒託詞為其報仇煽惑各徭匪等輾轉糾約共有二千餘人因見人衆遂推盤均華為徭王用紅布製成旗幟派鄧進印馮文科等十四人為頭目並脇逼鄭富才趙明堂入夥六月十九日盤均華令伊黨在趙金香門首拏一夏姓人殺死祭旗起事用紅布包頭手持鎗械旗幟由賀縣之灰洞思洞等處一帶行走沿途搶掠糧食歷龍井村出道石墟二十五日行至芳林渡潛渡河東經同知易中孚偕叅將滿承緒等督兵尾追徭匪見官兵追急即佔據溝岸放鎗抵拒叅將滿承緒身

先士卒奮力指揮被猺匪中傷左肩甲署守備楊熹
右手腕亦受鎗傷官兵奮激爭先連環放鎗打斃猺
匪百餘人頭目趙春有李成剛陳元青俱經殲斃賊
仍恃衆不退時至夜半我兵追至大砲陸續施放至
二十六日黎明轟斃猺匪二百餘人賊始敗走我兵
乘勝追撲又殲斃猺匪千人生擒男婦三百餘名口奪
獲旗幟鎗械无算餘匪四竄又經鄉民獲送三百餘
名口是夜四鼓所獲猺匪乘我兵倦乏掙斷繩索互
相解放拋擲磚瓦將兵勇打傷我兵四面放鎗匪等
抵死抗拒經文武員弁令兵壯用梯登屋將猺匪盡

行殲斃又經文哲琿分搜零匪二百餘人拏藍盤友
奉趙金祿等首犯盤均華與伊養子盤生貴並男婦
七口逃至馬金凹山坡盤均華在半山寮棚外坐地
歇息旋有官兵帶同徭賊盤友奉趙金祿追及到處
搜捕盤均華悄從棚後滾下山溝七月初一日盤均
華至甕源地方與伊妻女並鄧進印馮文科趙有相
盤生香會遇各自逃生先是湖廣總督盧公提督羅
公准廣西巡撫祁公咨稱徭匪賀縣滋事之始以與
楚省江華嶺東地方連界嚴飭邊卡文武實力堵拏
並派護鎮祥福馳往嶺東督率備弁嚴防時有被脇

及逃難多人均至卡投誠就撫盤均華携帶妻女於七月初四日潛至江華縣屬之竹排界山崗躲避經降猺內之陳有金黃元富祝得安趙金星趙成容告知猺目趙德裕等報經守備阿臨泰署江華縣林先標馳往督同鄉勇猺目並廣西富賀營兵丁揚得再將盤均華及其妻女一併拿獲搜出刀械又有被脇之鄭富才趙明堂正欲赴卡投首亦被防堵官獲住時護鎮祥福督率阿臨泰王俊楊昌凱分布各卡聲威甚壯阿臨泰續獲馮文科趙有相鄧進印三名王俊續獲盤生香一名並有逃來男婦老幼共八百七

十餘人因人數過多飭彬州知州張鴻咸等按名查
訊有被盤均華焚燒房屋逼脇隨行經官兵剿散逃
至湖南就撫者有聞賊至逃來鄰境被難者計賀縣
難徭七百零一名蒼梧難徭五十一名分作四起解
回原籍安插尚有難徭一百二十三名係原籍江華
縣赴粵西佃種山地未久房屋山場俱已荒燬情愿
仍舊歸本籍當飭傳親族及徭目妥為安置徭境肅
清邊圉綏靖羅提督
仍回錦田督率防堵

廣西賀縣土徭滋事初中丞調遣文武員弁即
時撲滅芳林渡戰功保全甚大惟以首逆殲斃
奏聞而楚省又經生獲緣馬金四之役將徭匪盤

友鳳趙金祿帶往指認屍身不知其滾岩竄逸
查認无首屍身見與盤均華身穿服色相似旁
有已殺孩屍係其領養長子且有所帶玉戒指
為證以致誤報首逆已斃嗣經咨提廣西要犯
盤友奉等五名到衡提同盤均華令其認識均
稱的係賀縣聚众首匪粵西所指乃係因疑誤
認盧宮保復督同臬司楊及廣西委員耿省修
趙光壁眼同質實毫无疑義審明後即將首從
各犯照律寸磔傳首犯事地方以昭炯戒而盤
均華之事乃結